

SERENISSIMI
REGIS ORATIO, PER
SEIPSUM HABITA IN
superiori Parlamenti domicilio : co-
ram Dominis, tum Spiritualibus, tum
Temporalibus, & Equitibus auratis,
Ciuibus, ac Burgenfibus, in eo loco
congregatis. Die Lunæ 19. Martij.
1603. primo nempe die huius Parla-
menti: primo itidem Parlamen-
to Regni Maieftatis fuæ.

In Latinum sermonem verfa: ROGERO
MARBECK, *Regio Medico*
Interprete.



LONDINI,
Impensis Georgij Bishop.
1604.



F

S

Pa



in
te
re
fu
no
ru
ra



JACOBO REGI

SERENISSIMO, DOMI-
NO MEO CLEMEN-
TISSIMO.

*Parce precor Rex summe, potens, mitissime Princeps:
Quòd tua non verear dedecorasse meis.*



VAMPRIMUM Deo
Opt. Max. placuerat,
paulò clementiùs no-
biscum agere, Angeli.
que sui voracissimi, in

istius Ciuitatis Plebeculam immani-
ter grassantis, vim omnem, & furo-
rem auerterat : nihil mihi aut prius
fuit, aut optatius, quàm vt publicum
hoc *Parlamentum*, celebremq; meo-
rum Subditorum conuentum procu-
rarem : idque tribus potissimùm de

causis, ad istud negotium me com-
mouentibus. De quibus, vnica illa
prima, (quæ grati beneuoliq̃ue animi
mei significationem in se continet)
etiã si nulla alia præter eam fuisset,
fatis tamen in se ponderis, & momen-
ti habuisset, cur istud à me in hoc tem-
pore fieri debuisset. Cogitanti enim
mihi, quanta cum lætitia, & quàm in-
credibili cum alacritate animorum
omnium, concorditer applaudentium
& congratulantium mihi ad hoc meū
solum aduentanti, quod tum heredi-
tario meo iure, tum singulari bonitate
Dei hæc omnia ita nobis prouidente
& destinante, suo nunc tempore ob-
uenerat, hunc meum aduentum ex-
ceperitis. (Postquam nimirum præ-
potens ille Deus, serenissimā vestram
nuper Reginam, multis iam annis, &
diebus plenam, veri autem honoris,
tum laudibus, tum trophæis plenissi-
mam, ex hac vita euocauerat.) Nihil
profectò magis necessariò faciendum
videbatur,

videbatur , quàm vt ego, vobis hîc
nunc omnibus præsentibus, & ad to-
tius huius Regni quasi corpus repre-
sentandum coeuntibus, ego inquam
ipse proprijs meis verbis publicè te-
statum relinquerem, quàm memori,
gratoque animo totus iam læter, &
triumphem, cùm id quod ex officio
vestro vobis faciundum fuit, tam a-
manter iam nunc & tam religiosè fa-
ctum conspexerim. Profectò, inge-
nuè fateor, ex hac re, tantam me cœ-
pisse voluptatem, vt nullo orationis
flumine, verborumque profluentiâ,
solidam illam & expressam grati ani-
mi mei effigiem possim depingere.
Hoc solūmodò illud est, quod vobis
velim esse significatum, & persuasum:
pro hac in me infinita vestra, tum be-
neuolentia, tum pietate, me & iam
nunc promptum esse atque paratum
in omnes partes, ac in posterum sem-
per fore paratissimum, ad hanc ve-
stram humanitatem, quibuscunque

modis potero, compensandam.

Quid enim? Obliuiscar ne vnquam? Imò, an me potiùs vnquam posse obliuisci arbitramini, quantà cum alacritate & beneuolentia, quantà cum animorum coniunctione, atque consensu, quàm firmis denique votis iunctisquē suffragijs, idque præter omnem expectationem, me Regem vestrum legitimum, hereditariumque Gubernatorem, non solum publicis vestris vocibus, & acclamationibus, sed intimis etiam animi studijs ac voluntatibus, tanquam dulcissimis cordis vestri vlnis atque amplexibus, me inquam, huc ad vos venientem exceperitis? An ille: ille inquam Dies, è mea memoria vnquam elabatur, in quo, primo meo in hoc Regnum aduentu, tantus erat vndique omnium hominum concursus, huc atque illuc confluentium, imò potiùs, ab omnibus huius Regni partibus conuolantium, vt me, tanquam
nouum

nouum quendam hospitem, & viderent, & salutarerent obuium? Quorum oculi, linguæ, voces, totusque corporis gestus atque motus: nil aliud spirabant, quàm insignem quandam, ardentemque animi pietatem, incredibilem cordis lætitiā, & voluptatem, summumque & inexplebile quoddam desiderium, eius & videndi, & complectendi, quem nouum nunc suum, & indubitatum Regem, saluum huc aduentasse tantopere lætabantur? Quid ergo retribuam?

Quid enim, an illud vnquam in me ipso collaudabo, quod nunquam in alijs vllō modo potui approbare? Nil herculè minùs. Ingenuè enim, & apertè hic vobis omnibus præsentibus fateor, me meo naturali quodam motu, atque impetu, semper illud hominum genus improbasse, qui cum sunt in ære alieno, blandiloquentijs solummodò suis, & verborum lenocinijs, creditoribus cupiunt satisfacere: tales

enim suspicor debitores, nullam omninò curam habere, vt ad dictum diem pecuniam quam debent representent: nec quicquam illis magis in votis est (opinor) quàm vt delicato hoc sermonis apparatu, creditores suos decipere, ac os illis perbellè possint oblinere.

Quocirca, vt gratam animi mei voluntatem plenius vobis exprimam, ad duas illas alias rationes (quibus animum induxi meum, vt hunc in modum tam solemniter vos congregarem) mihi confugiendum est: vt non tam verbis, quàm factis, hic meus in vos amor, gratusque animi affectus meliùs innotescat. Atque hæ duæ rationes, quanquam arctissimè inter se connectuntur, in meisque actionibus consistunt, (in quibus perficiundis, spero per gratiam Dei, quamdiu vivero, me vobis nunquam defuturum ad animi mei pietatem erga vos testificandam) tamen duæ illæ rationes,

re verâ quodam modo diuiduntur. Sunt enim quædam ex illis meis actionibus, quibus vobis omnibus cupio gratificari, tam consertè, contextèq; cum mea Persona copulatæ, vt indiuiduo penè nexu, cum illa coniungantur. Sunt autem aliæ nonnullæ de illis, quæ eam habent naturam, vt liberum mihi sit, & immune, vtrùm eas actiones, aut velim, aut nolim, meo pro arbitrio exercere: spero tamen, adiuuante Deo, nullum vnquam tempus fore, in quo velim benefacendo defatigari.

Quòd verò ad primum genus attinet, multa quidem sunt illa fœlicitatum genera, quibus Personæ meæ præsentia, Deus Opt. Max. vos omnes cumulauit: & eundem præpotentem Deum testor, ex ea re, plus me verè, & ex animo lætari ac gloriari, quòd hæc mea præsentia vos ipsos tantoperè beauerit, quàm quòd ista, quæ mihi nunc facta est honoris ac-

cessio, priuatam aliquam commoditatem attulerit. Atque vt ex istis tam multis foelicitatibus, quæ vnà mecum vobis apportantur, primam illam, quæ sub vestrum aspectum contemplanda vobis subit, attingam: Ecce vobis *publicam Pacem*: *Pacem* inquam extrinsecam, cum cæteris omnibus vicinis nationibus coniunctam. Licet enim mihi, & iustè, & verè affirmare, ex omni illo tempore, quo primùm regnare cœpi, nullum vnquam aut Regem Christianum, aut Remp. extitisse, qui vel mihi iniuriam aliquam obtulerit, vel à me cuiquam oblatam acceperit. Semper enim hætenus, pacem & amicitiam cum omnibus conseruaui, & ob eam rem, gratias ago Deo immortales.

Atque hoc tantum, & tam salutare bonum; vos ipsi optimi testes esse poteritis, tam coniunctim Personæ meæ, ac tam indiuiduè annexum esse, vt quàm primùm in hoc regnum intraueram,

ueram, quod diuturno quodam bello, molestoque, iamdudum totum lassatum & irretitum reperi, omnes hæ tempestates, meâ solummodò præsentia, statim in omnibus ijs locis sedarentur, in quibus paulò antè, nihil aliud quàm *Arma & Bella* personabant.

Grande quidem beneficium, & summis laudibus prædicandum. Vbiunque enim pax est & tranquillitas cum propinquis: ibi florescunt ciuitates, ditantur Mercatores, rerum communitates, & commercia vigent, & omnia negotiatorum genera, tam liberam quandam habent potestatem ad sua negotia obeunda, vt sine villo, vel periculo, vel turbamento, summa securitate perfruantur.

Neque tamen velim vt istud, quod à me nunc dictum est, aliter atque sentio, accipiatis. Hanc enim, quam ego externam dico cum alienis pacem, nolim existimetis, tam insepa-

rabili modo, Personæ meæ iunctam
 esse, & alligatam, vt ausim spondere
 illam sempiternam fore, & ad omnem
 insequentem ætatem inuiolabilem.
 Interim autem, istud vobis non du-
 bitanter affirmo, & in verbo Regis
 audacter possum polliceri: quòd nul-
 la vnquam per me dabitur occasio, ad
 hanc pacem perrumpendam, neque
 vllò vnquam animi mei motu vel af-
 fectu committam, vt hæc tanta tran-
 quillitas propter priuatum aliquod
 commodum meum perturbetur; nisi
 aliqua necessitas, aut ad hujus impe-
 rij dignitatem restaurandam, aut ad
 publicam Reip. salutem conseruan-
 dam, ad illud negotium me contra
 meam voluntatem impulerit. Id enim
 si aliquando euenerit, tunc profectò
 iustum nobilèque bellum incertæ
 turpique paci infinitis partibus præ-
 ponendum arbitror. Cæterùm, in-
 terea tamen loci, diuturna illa tot me-
 arum præteritarum foelicitatum expe-
 rientia,

rientia, quibus per totius vitæ meæ
 cursum, vel ab ipsis meis incunabulis,
 misericors ille Deus meus me cumu-
 lauit, facit, vt vehementer confidam,
 quod nec huius diuinæ suæ erga me
 bonitatis eum vnquam poenitebit,
 neque multiplices hasce beatitates,
 quibus me hætenus tantoperè per-
 beauit, continuare recusabit. Quo-
 circa, quod Rex ille *Dauid*, propter
 tot suas victorias præteritas, solebat
 dicere. Illud idem, propter hanc me-
 am tam diuturnam pacem, & mihi
 quoque aptè, conuenienterque di-
 cendum videtur: *Non equidem dubi-*
to, quin idem me Ioua, qui à leone, &
urso defendit, ab isto quoque Palestino
preputiato defensurus sit.

Quanquam autem fatendum est;
 externam istam pacem, magnum me-
 herculè argumentum esse diuinæ in
 nos bonitatis & fauoris: nequaquam
 tamen habet pax istæc externa, tantum
 in se foelicitatis, ac voluptatis, quan-

tum habet interna illa & domestica. Bella enim ciuilia, ac intestina, multò sunt deteriora quàm illa quæ geruntur foris. Atqui ista pax, quæ domi apud vos est, atque interna, alterum illud foelicitatis genus est, quo vos perbeauit hæc Personæ meæ præsentia. Idque dupliciter: vno certè modo, per binarum illarum pernobilium familiarum, olim inter se horribiliter discordantium, Vnionem: altero verò modo, per amborum istorum florentissimorum Regnorum, Angliæ, & Scotiæ foelicissimam coniunctionem. Cùm enim ipse, iure meo hæreditario, recto ductu, ex ipsius Regis *Henrici* septimi lumbis, ortum meum traxerim: hinc fit, vt ambæ illæ nobilissimæ familiæ, illustrissimarum Rosarum regiarum, per me, firmo quasi vinculo, in vnum coalescant & confirmentur. Cuius quidem optatissimæ Vnionis, vt Rex ille, beatissimæ memoriæ, primus erat effector &

con-

coniunctor; sic etiam & iucundissime
alterius illius pacis, primus extitit au-
tor atque fundator.

Luctuosæ illæ & miserabiles cala-
mitates, quibus, binis illis familijs tam
acriter dissidentibus, vniuersum hoc
Regnum affligebatur, tantæ sunt, &
tam horrendæ, & tam recentes ac fa-
cilè memorabiles, vt superuacaneum
esse putem, illarum memoriam vobis
refricare. Atque hæc omnia, tanta &
tam luctuosa dissidia, quæ superiori-
bus illis temporibus, florentissimæ
huic Reip. nihil aliud quàm ruinam
& exitium minitabantur, non aliter
per prædictum illum *Henricum* extin-
guebantur, quàm nunc etiam per me
penitus sepulta iacent: cuius Parente-
la & natalitia, non solùm ab illustris-
simo illo *Henrico*, sed etiam ab anti-
quiore vtriusque familiæ stemmate,
recto quasi tramite deriuantur.

Neque hîc profectò cōsistendum
est, sed longiùs etiam adhuc progre-

diendum. Harum enim binarum per-
nobilium familiarum, tam insignis, vt
ita dicam, coalitio ac coniunctio, mag-
num quiddam est, & inprimis salu-
tare, fateor: si tamen cum altera illa
pace, quæ per me vobis apportatur, &
per quam hæc duo perantiqua Regna
inter se copulantur, & in vnum coa-
lescunt, conferatur: profectò non
est tanti, vt cum illa comparetur.

Atque hoc in loco, patientiam ve-
stram tantisper postulo, & expecto,
dum liceat mihi paulò longius pro-
gredi, & magis partitim vobis com-
memorare illa omnia beneficia, quæ
per me, ex hac sanguinis mei affinitate
ac coniunctione oriuntur. Harum e-
nim rerum plenior consideratio, ad
me solummodò spectat, & meam
præ cæteris omnibus personam attin-
git: quoniam permagni huius corpo-
ris, tam foeliciter iam nunc vniti &
coagmentati, ego ipse caput sum &
fundamentum.

Primum

Primùm igitur, licèt non altioribus
 argumentis, quàm Physicis tan-
 tùm & naturalibus rationibus rem to-
 tam ponderemus, facillimè tamen
 nostris mentibus & cogitationibus
 poterimus concipere, ex foelicissima
 ista Vnione, quanta & quàm infinita
 bona in vniuersam hanc Insulam pro-
 manauerint. Nam, si viginti millia
 hominum satis potens est validusq;
 exercitus ad præliandum: ecquis du-
 bitabit quadraginta millia virorum,
 duplò plus virium habitura ad victo-
 riam comparandam? Si aliquis è Ma-
 gnatibus, ex agris suis, annuisq; pro-
 uentibus, seipsum duabus partibus
 ampliùs ditauerit, quàm vsquam an-
 teà possederat: an non illum hominẽ,
 duplò plus nunc ditiozem & potenti-
 orem esse, quàm anteà, existimabitis?
 Ipsa natura nos docet, ex perexiguor-
 um atomorum concursu, grandio-
 res etiam montes fieri: & ex paruulis
 quibusdam oppidulis, vicis, ac pagis,

per potentiores Tyrannos cuius & subactis, amplissimas & vrbes, & Comitatus, & regna etiam atque imperia tractu temporis fuisse constituta? Ex quibus minutioribus exordijs tanta sunt subsequuta incrementa, vt in fortissimas tandem, & gloriosissimas Monarchias excreuerint; easque tam benè instructas & munitas, vt non solum seipsas, contra vim omnem & potentiam tutò possent defendere, & quamcunque iniuriam extrinsecus oblatam repellere, sed illorum etiam hominum temeritatem acerbius punire, qui contra Regni sui dignitatem quicquam turbidè ac violenter attenterint. Quid? an non adhuc etiam meministis, in hoc ipso Regno, in quo nunc sumus & viuimus, fuisse aliquando, idque præter *Cambriam*, quæ nunc *Wallia* dicitur, septem Imperia, partitim inter se, & seorsim distributa? Ecquid dubitatis isto nunc modo, & ex hac Vnione, huius imperij

perij vires, per innumeras jam partes excreuisse, & ad tantum robur peruenisse? Aut ex *Cambria* cum hoc regno coniunctione, an non arbitramini Insulam istam Anglicanam, multò nunc potentio rem euasisse? Atque, ut nunc de *Wallia* pauca quædam obiter interponam:

Quamquam *Cambrensis* ille Principatus, omnium opinione, satis potens quoddam validumque Imperium habetur: si tamen cum antiquo illo & glorioso *Scotorum* regno compareretur: necesse est, ut locum illi det, ac permultum cedat *Scotiae* magnitudini atque potentiae. Sed quid opus est rationibus & coniecturis uti probabilibus, cum manifestum sit, hæc omnia, ita uti videtis, euenisse, non sine summa prouidentia, sic cuncta moderantis & destinantis Dei. Quis enim non videt, hæc duo regna, & linguâ, & religione, & morum etiam similitudine, quàm arctissimè inter se

iuncta esse & copulata? Imò, ita nos omnes in vnam Insulam coniecit Deus & congregauit, vno item Pelago circumcirca fluente, tanquam firmo quodam muro, sic nos circumsepsit & muniuit, vt ipsis extremarum vtriusque nationis partium incolis difficillimum sit, proprios suos agrorum terminos atque limites distinguere. Hæc enim duo regna, cùm neque vastitate maris, neque fluminis alicuius magnitudine, neque montium præruptorum altitudine, neque vllò alio naturali impedimento disiungantur, sed paruulis quibusdam lacubus atque riuulis, murorùmque nonnullorum ruderibus, vetustate temporis sic collapsorum & exæforum, vt vix iam restent illorum vestigia nostris sensibus percipienda; nunc tandem aliquando, hoc iure meo hereditario, ad quem vtriusq; Coronæ prærogatiua, legitimis meis natalitijs ritè pertinet, tam firmiter connectuntur, vt
in

in vnum quasi corpus coiuisse, ac vnum quendam munitissimum mundum constituisse videantur: isque (ut videtis) naturę beneficio, tam admirabiliter, altissimarum quarundam aquarum voragine, veluti scrobibus nonnullis profundioribus, ita circumseptus est & defensus, ut omnes illę prioris seculi formidines, quibus hæc natio vehementer angi, & discriutiari solebat, iam nunc personę meę præsentia penitus amputentur. Semper enim antehac, altera illa istius Insulę pars, quę Scotica est & Borealis, magnam præbebat oportunitatem, ad peregrinos excipiendos, si quid per vim aliquando, & bellicos incurfus, in istam regionem moliri conarentur. Et idcirco hoc semper à vobis prouidè prudentérque prouisum fuit, ut subitis vestris incursionibus Scotorum quies crebrius interturbaretur; eo enim modo, dum auersierant, & auocati ab alijs victorijs acquirendis:

ad sua domi defendenda, & ad posticam (vt aiebant) suam benè tutandam toti erant attentiores. Neque certè potuit quicquam aliud à vobis ingeniosius excogitari, ad Antecessorum nostrorum consilia retardanda, quotiescunque aut de magnis rebus foris gerundis, aut de insignibus sibi victorijs aliundè comparandis cogitabant.

Quocirca, id quod Deus coniunxit, homo ne disiungat. Ego verò maritus sum, & tota hæc Insula vxor mea est legitima: ego illius caput, illa mihi corpus: ego sum pastor, illa certè meum ouile. Cùm igitur ego Rex sim Christianus, & Euangelium Dei libentissimè amplectar: spero neminem tam desipientem esse, vt me velit vel Polygamum fieri, vel binarum vxorum maritum, vel par esse putet, cùm sim caput, corpus vt habeam aliquod monstrosum, & in plures partes diuulsum: vel cùm pastor

sim,

sim, habeamque ouile tam capax & spatiosum, vt nullum aliud in eo sepimentum sit, præterquam quatuor illa celeberrima maria; ego tamen oues custodiam meas, tam longè inter sediectas & dissipatas, vt Palantium more, in locis deujs atque ignotis oberrare videantur.

Hoc autem pro certo, certoque mihi persuasum habeo, neminem esse ex meis honestioribus subditis, qui minùs lætatur, & ex animo triumphat, quàm ego ipse lætus sum ex istac Vnionem. At si fortasse aliquid sit, quod videatur posse probabiliter objici ab illis hominibus, qui vel ægrè ferunt hanc Vnionem, vel quantum in ipsis est impedire cupiunt, opus istud tam præclarum, quod in mea Persona, bonitate Dei, exædificatum iam est & stabilitum: certè id totum quicquid est, quod ab eis obiectari potest, & friuolum est & facilimum ad diluendum. Sed & spero, & credo etiam,

nullos omnino posse reperiri, qui cōtra hanc vnionem velint quicquam obmutire; nisi sint aut ignorantia penitus obcoecati, aut malis cogitationibus sic abrepti, & deprauati, vt vel in nulla Rep. bene constituta possint viuere, vel nusquam alibi, quàm in turbidis lacunis, atq; coenosis, piscandum arbitrentur. Nam, si de Regni dignitate & priuilegiorum prerogatiua concertandum putant; vtrumq; certè Regnum, à principio, nil aliud fuit, quàm Monarchia. Vnde necessariò sequitur, vtrique corpori, proprium suum caput nunquam defuisse, quoniam indiuiduo quodā nexu, caput semper solet corpori adherescere. Quocirca, vt honores & priuilegia illorum Regnorum, nullo modo separari potuerunt à suis Principibus: sic in meā nunc persona, qui amborum coniunctim Regnorum, pari iure caput sum, omnes illæ dignitates pariter coeunt, & coniunguntur.

Cum

Cùm istud regnum Angliæ in multos erat dominatus & imperia discerptum, & diuulsum; (id quod olim fuit apud seculum prius, vt vobis modo significauimus) fieri profectò non potuit, quin alterum illorum ab altero, tractu temporis paulatim absorberetur, donec in vnum quoddam corpus, omnia redacta coalescerent. Interim tamen Wiltonia, & Deuonia, quæ duo ad Occidentales Saxones pertinebant, quorum imperia longissimè perdurabant, & suis armis atque virtute reliquos omnes Regulos debellabant: omnium aliorum honorum præcedentiam ac prærogatiuam, suo quasi iure sibi assumunt: & Suffolciæ, atque Essexiæ, ac cæteris omnibus Comitatibus ab ipsis superatis, se dignitatis gradu præponi postulant.

Præterea, an non idem ipsum experimur in Gallia euenisse? Quod nihil aliud est quàm regnum quoddam ex multis Ducatibus, vi & armis, iam-

dudum subactis, & absorptis conflatum & coagmentatum. Nam, ut minutiores illi lacus, in grandiores fluuios illabentes, vsitatum suum nomen omnemque sui memoriam penitus amittunt: & quemadmodum grandiorum etiam illorum fluminum nomina prorsus pereunt, & euanescent, postquam illapsa in Oceanum; ubi absorbentur, excurrerint: sic multorum paruulorum Regnorum in vnum coeuntium coniunctione, omnes illarum dubitationes, ac legales disceptationes, quæ antea solebant haberi, de terrarum regedarum iuribus, & Principatibus, continuo extinguuntur.

Atqui, cum Saxonum illa tot Imperia, *Bellona* viribus & hastâ subacta, atque in vnum Regnum coacta, tam foelicem exitum habuerint: quid quæso impedit, quò minùs sperandum sit, foelicissimos itidem fore successus, ex grandissima hac illustrissimæque coniunctione, quæ nuptiali

stree

~~stret~~ annulo tam auspicatò copula-
 tur: Et quoniam non sine præpoten-
 tis Dei numine atque ductu, factum
 est, ut Scotica terra, quæ istius insulæ
 dimidia pars est, recentem me natum
 & in cunis vagientem videret, pri-
 mamque illam & imperfectam ætatis
 meæ partem possideret, vos verò hoc
 quod reliquum est, & maturioris hu-
 ius & perfectioris ætatis meæ curricu-
 lo perfrueremini: Spero quidem ne-
 minem tam asperum & iniuriosum in
 me fore, ut, si optio illi daretur, diui-
 di hoc meum corpus vellet, aut in va-
 rias partes dilacerari, ac discerpi. Cæ-
 terum, hac in re, satis diu commora-
 tus sum: habeoque mihi satis persua-
 sum & exploratum, totam hanc ora-
 tionem meam fuisse vobis acceptissi-
 mam.

Iam verò, quanquam omnes istæ
 foelicitates, tum externæ, tum internæ
 quæ à me commemorantur, permag-
 næ quidem sunt & in summo pretio

habendæ: tamen nisi tantorum bonorum continuandorum spes aliqua subesset & expectatio, illa omnia profectò multò leuiora existimarentur. Ecce igitur vobis, hac etiam in re, summum erga nos Diuini fauoris ac bonitatis argumentum. Cùm enim mihi corporis mei prolem, eamque vt videtis præsentem, (& vt spero, non inscitam) tum maximæ spei plenam, tum insigni sanitate imbutam dederit. Profectò nullo modo dubitandū est, de ista foelicitate, quæ cum mea Persona coniuncta est, continuanda. Sub qua, spero omnia illa bona, siue interna, siue externa, quæ per me vobis impertiuntur, eam in se habere stabilitatem, vt in omne æuum sint duratura.

Cæterùm neque pax ista externa neque interna; neque reliqua illa bona, tum præsentia, tum futura, de quibus locuti sumus, vllius profectò sunt momenti: sed tanquam putrida
quædam

quædam præsidia, maximèque fallacia sunt existimanda, nisi Deus, singulari suo fauore, illa sic secundauerit, ut stabilem eis firmitatem concefferit: *Nisi enim, Ioua urbem custodiat, frustra vigilat custos. Nisi Ioua domum ædificet, frustra laborant, qui eam ædificent: & frustra seret Paulus, frustra rigabit Apollo, nisi Deus auxerit: ut Paulus ipse confitetur.*

Omnes enim istæ humanæ foelicitates, nihil aliud sunt quàm veluti flores caduci, ac subitò euanescentes vmbrae, aut tanquam Paleę ventorum flatibus huc atque illuc agitatae, nisi ad regia folia nostra conseruanda, & veræ religionis confessione, & bonorum operum assiduitate, diuinæ Maiestatis Numen, ita uti nos decet, exorauerimus. Quanquam verò, quamprimum in hoc regnum intraueram, tum multis meis congressibus cum viris Ecclesiasticis, tum plurimis etiam Edictis ac Proclamationibus, mentem

meam ad Religionem spectantem, ita
 uti par fuit, & plenius, & planius iam-
 dudum patefeci: non tamen superua-
 caneum esse puto, ut de intimis animi
 mei consilijs ac cogitationibus, nunc
 iterum velim vobis meam sententiam
 apertius significare. Spero enim per
 gratiam Dei, nullum unquam tempus
 fore, in quo me pudeat Religionis
 meae confessionem publicè profiteri:
 id enim si committerem, vehemen-
 ter pertimescerem, ne me itidem, &
 coram Angelis, & coram hominibus
 Deus ipse denegaret. Atque in hoc
 potissimum tempore, istud mihi præ-
 cipuè cauendum est, ne homines pa-
 rum cauti & inconsulti, meorum ite-
 dem consiliorum ignari, meâ tum le-
 nitate, tum patientiâ, ad Parlamen-
 tum istud conturbandum, intempe-
 rantius abutantur.

In primo hoc nostro aduentu: v-
 nam quandam Religionem, nostræ
 professioni haudquaquâ absimilem,
 eamque

eamque & publicè approbatam, & vestris legibus stabilitam inueni, fateor: cæterum, & alium etiam Dei cultum in intimis huius Regni visceribus latentem; præter tertiam quoque quandam priuatam Sectam furtim & in angulis perreptantē reperi. Prima illa & vera est, & tum per me imprimis approbata, tum legum vestrarum autoritate confirmata. Altera verò illa secunda falsa est, & erroris plena: quæ, quanquam à multis appellatur Catholica: tamen re vera tota est Pontificia. Tertia illa, quam ego Sectam potius quàm Religionem appello, est istorum Puritanorum ac Nouilistarum circa Religionem opinio: Qui in nostrâ professione, non tam in ipsis Religionis nostræ articulis ac fundamentis, à nobis discrepant, quàm in curiosis quibusdam paritatis punctulis, & Politicis nonnullis gubernandi formulis. Qua in re homines isti inquieti, rerum præ-

sentium moderationi aduersi, & ad
superiorem potestatem tolerandam
inepti, paulò tumultuosius quàm
par est, se gerunt: & hanc ob causam
Sectam istam, vt odiosum quiddam,
& turbulentum, ex omni Rep. rectè
instituta, eijciendam puto. Cæterum,
quæ sit mea de illis sententia & opi-
nio, in publicis meis hac de re Edi-
ctis & Proclamationibus, vt antea di-
xi, patefactum reperietis.

De Pontificijs verò vt loquar: pro-
fectò equissimum illud esse mihi vi-
detur, vt differentiam quandam po-
nam, inter priuatam meam, salutis
causâ, Religionis professionem, & pu-
blicam Reipublicæ administrationem,
propter communem omnium utili-
tatem, & quietem constitutam. Quod
ad meam attinet professionem, habe-
tis me iam inter vos, illius religionis
caput: quàm & corpus, & membra
illius capitis profitentur: & vt sangui-
nis coniunctione ac cognatione vos
propius

propiùs attingo: ita, & omnium eti-
 am illarum rerum vobiscum particeps
 sum & affinis, quas verus domus Dei
 cultus, & sacrosancta religio requirit.
 Quanquam autem aperta hæc mea
 confessio, cum primis illis educationis
 meæ fundamentis perfectè congruit,
 in qua (bonitate Dei) vnà cū nutrice
 veram pietatem suxisse videor: tamen
 in hoc vestro conspectu, hîc coràm
 profiteor, nunquam vel ad laudem a-
 liquam constantiæ aucupandam, vel
 ad vllam aliam præiudicatam opinio-
 nem retinendam, hanc quam profi-
 teor Religionem, me tam firmiter, &
 obstinatè defendere voluisse; nisi ma-
 nifestò reperissem, eam tum rationi,
 tum regulis fidei ac conscientiæ, ma-
 ximè consentaneam extitisse. Neque
 tamen in hac mea professione, aut ni-
 mis vnquam vehemens, aut præter
 modum rationemque pertinax fui.
 Libenter profectò fateor & agnosco:
 Romanam Ecclesiam matrem nobis

extitisse: quanquam nonnullis nunc maculis, & corruptelis inquinetur: id quod Iudæis accidebat, tum cum Christum crucifixerunt. Sed, vt in homine ægrotante, ille nullo modo infirmo illius corpori inimicus est habendus, qui medicinam adhibendam suadet, vt à vitiosis humoribus perpurgetur: Similiter & ego Romanensium Ecclesiæ nullo modo inimicus sum censendus, si auidè cupiam, vt illorum errores, aut tollantur, aut emendantur. Casum certè & ruinam illius Ecclesiæ non exopto; fordes solummodò elui, & corruptelas remoueri cupio. Aliter enim, quo modo queunt petere à nobis & requirere, vt *intremus*, nisi & domum suam priùs nitidissimè verri, & à suis fordibus emundari procurauerint. Profectò nō est quisquam inter Puritanos, tam curiosus & insipiens, qui minùs laxas, solutasque habenas habeat, ad dispensandum, vel cum minutissimis etiam rebus

rebus ad conscientiam pertinentibus, quàm ego habeo: ægrè tamen adducor, vt propter priuatam aliquam opinionem meam, in meorum Subditorum, siue corpora, siue animos velim paulò duriùs imperium exercere meum. Imò, semper ego tantoperè abhorruì, à meorum Ciuium conscientijs vel acerbìus affligendis, vel præter fas & æquum nimium constringendis, vt omnibus illius religionis professoribus hîc commorantibus, satis iam notum sit & perspectum, (vt opinor) post meum in hoc regnum ingressum, quàm clementer cum eis egerim: tantumque me abesse ab omni acerbitate & acrimonia, vt quibuscunque modis, siue per legem, siue per vllam temporis oportunitatem, commodè possem illos alleuare, id totum libentissimè potiùs præstiterim, quàm voluerim committere, vt plura onerosa grauamina illis, cùm *Rheboam*, adaugerentur. Nuperrimè

etiam in istud negotium, totis animi
 mei viribus incumberebam, ut omnia
 illa statuta & plebiscita, quæ contra
 Pontificios ferebantur, diligentius
 examinarem & perpenderem: ut si
 quid esset in illis, quod hætenus vel
 acerbius scriptum, vel à Iudicibus
 paulò durius explicatum fuerit, hinc
 iustam occasionem acciperem, ut
 quicquid in eis, vel immutandum, vel
 mitigandum reperiretur, id iustis ra-
 tionis ponderibus (id quod ego le-
 gum vitam esse arbitror) & providè
 & modestè perficeretur: ne aliquid in
 eis relinqueretur, quod bonos viros &
 honestos, non minùs offendere,
 quàm fontes, ac grauitèr delinquen-
 tes punire videretur.

Nunc verò, ut ad illos meos subdi-
 tos propiùs accedam, qui Pontificiæ
 huic Religioni sua nomina dederunt,
 eos omnes in duo genera esse diui-
 dendos existimo. Nam aut Clerici
 sunt & literati, aut imperiti & plebei.

Quod

Quod ad hos Plebeios attinet : certè in ea semper opinione fui, vt eos multò minore reprehensione dignos existimarem, quàm literatos illos atque Clericos : quoniam illud hominum genus tam rudem quandam fidem, & tam dubiam atque implicitam (super Ecclesiam autem suam fundatam) profitentur, vt nisi illa omnia confusè generatimque crediderint, quæ in illorum doctrina traduntur, nullo modo possint illis erroribus inquinari, qui à Papistis tam acriter defenduntur.

Sed & istorum etiam Laicorum duo sunt genera: quorum alterum sobrium quoddam & quietum hominum genus est, & quoad externum vitæ cursum bene moratū : quos iam ætate prouectos, dispudet ab inueteratis suis opinionibus recedere, quibus à primis suis temporibus imbuebantur: id enim si facerent, existimationi suæ valdè dedecorosum fore arbitrarentur.

Alterum est illorum genus floridum & iuuenile, qui in corruptis quibusdam locis, ab ipsis incunabulis suis edocti & educati, in loco boni ac salutaris alimenti, pestiferos istos errores, tanquam lac à nutrice, suxerunt. Prius illud hominum genus, ægrè quidem adducor, vt propter animorum lapsus & errores, grauiter puniendos putem. Harum enim rerum correctio & emendatio, solummodò à Deo, & sancto Spiritu expectanda est.

Aliud autem adhuc Laicorum genus est, qui inquietis quibusdam humoribus vexati, rerum nouarum audiendi, turbidisque animorum motibus agitati, idcirco suas in religione sententias crebrò commutant; vt furiosos in Rep. tumultus & factiones fanaticas commoueant, neque istud aliam ob causam faciunt, quàm vt Remp. optimis legibus benè constitutam, malè perturbent. Atqui istorum hominum

furientium conatibus, ne longiùs serpat illorum pertinacia, primo quoque tempore à nobis, obuiam eundum arbitramur : penes quos & iustum est imperium : & harum rerum emendandarum summa potestas.

Quod verò attinet ad Clericos: hoc illud est, quod ego planè protestor & affirmo : quòd quamdiu vnam quandam absurdam in sua doctrina opinionem defenderint, & vni-
tidem alteri pestifero errori in suis actionibus ac Praxi patrocinati fuerint, tam diu nullo modo ferendum est, vt in hac nostra Rep. commorentur. In illorum doctrina, arrogans illud & odiosum Principatus desiderium, quo Papa sibi nimis insolenter vëdicat, nō solum spirituale quoddam ius, & imperium, in reliquos omnes Christianos : sed ciuilē etiam iurisdictionem atque potentiam, in omnes Reges & Imperatores, ita vt vnico pedis impulsu, non solum reges è suis solijs at-

que sedibus deturbare : sed Regna etiam illorum & imperia, suo pro arbitrio, cuicunque voluerit, disponere & dispertire queat. Hoc inquam tam absurdum illorum dogma, è Christianorum coetibus explodendum est.

Alterum monstrum & horrendū, quod in quotidianis suis actionibus, tanquam laudabile quiddam tanto perè probant, hoc est: nimirum *trucidare Reges*, & contra Principes, ac legitimos Magistratus, hostiles ciuium tumultus, bellicosque motus commouere : hoc illi nullum peccatum esse arbitrantur, sed potius laude dignum, & meritorium quiddam, vt ipsi loquuntur, autumant; postquam scilicet Romanensis ille Monarcha, vel monstrosum potius Ecclesiæ suæ caput, Regem aliquem horribilibus suis diris ac anathemate percusserit: aut Subditos eius ab omni vinculo fidelitatis & obedientiæ liberauerit, aut Regnum eius tanquam prædam, & spolium

spolium à Prædatoribus diripiendum
proscripserit.

Cæterum hac de re, nulla nunc
causa est, cur hoc tempore plura di-
cam. Hoc solum illud est, quod vos
velim intelligere: nihil mihi in meis
votis aut prius esse, aut optatius: quàm
ut tempus illud aliquando videam, in
quo, per me tanta in Religione con-
cordia, communisq̃ue animorum cō-
sensus, tandem aliquando procuretur,
ut omnibus factionum studijs & affe-
ctibus sepositis, in eximio illo & præ-
claro Medio, quod veluti Centrum
quoddam est, & summa rerum perfe-
ctio, cōcorditer possimus convenire.
Nam si illi Pontificij omnes illos cras-
sos suos errores, & novas opiniones
libenter ac modestè deponerent, quos
nec vlla honestâ ratione possunt de-
fendere: nec denegare queunt, quin
& multæ, & iustissimæ causæ sint, cur
emendentur: profectò, ego minimè
recusarem, quo minùs vellem in viam

memet dare illis in occursum, & amanter amplecti: eâ tamen lege, & conditione, vt omnes illæ (quotquot sunt) in opinionibus Nouitates, vtrique penitus amputarentur. Nam, vt mea fides antiqua est, & catholica, & Apostolica, ita certè, & ipse quoque omnibus antiquitatibus, ad Ecclesiasticam administrationem pertinentibus, omnem reuerentiam & honorem libentissimè tribuo. Atque hinc opinor fiet, vt per gratiam Dei, tam integrum me seruem, & ab omni labe incorruptum: vt neque in fide hæreticus: neque in ciuilibus Rerump. gubernationibus, vnquam sim futurus scismaticus.

Cæterùm vnum quiddam est, de quo omnes Papistas, quotquot in hoc Regno sunt, etiam atque etiam admonendos velim. Quanquã enim nihil est à mea natura disiunctius, quàm vt haberi velim persecutor: Tamen nolim hac in re, illos tam intemperanter

peranter abuti hac mea, tum lenitate,
 tum patientiâ: vt indè sibi aut liberum
 aut licitum putent, suos hîc coetus
 quotidie, aut vires suas in hoc regno
 adaugere: sperando aliquod vnquam
 tempus idoneum fore, (idque si non
 me viuentem, posteris tamen fortasse
 meis regnantibus) quod ad pristinam
 hanc suam Religionem, iterum reno-
 uandam, ac restituendam oportu-
 num arbitrentur. Imò potiùs hoc sibi
 velim persuasissimum habeant. Quod
 villorum personis fautor sum in pri-
 mis, & optimè cupio, quamdiu ni-
 mirum seipfos, & honestos Ciues, &
 fideles subditos præbuerint: ita certè
 solenni voto, animo obstinaui meo,
 me perpetuum quoddam bellum, i-
 stis suis absurdis erroribus denuncia-
 turum. Et quemadmodum, nihil est
 profectò quod maiorem mihi dolo-
 rem potest facere, quàm si malis suis
 moribus effecerint, vt ad vitam cor-
 pusque illorum conseruandum, ego

curā omnem meā, & patrociniū obij-
 ciam : ita certè animum induxi meū,
 nullum me vnquam aut tempus, aut
 oportunitatem prætermiffurum, ad
 putidos illorum errores, futelesque o-
 piniones conculcandas. Nam fi ab-
 surditates illas denuò nunc nafci, &
 repullulare permetterem: primum e-
 quidem & mihi ipfi, ac conscientia
 meæ grandem iniuriam facerem: de-
 inde de tota hac Infula, peffimè pro-
 mererer: prætereà, tum illis huius Re-
 gni partibus à quibus exiui, tum iftis
 etiam in quibus nunc fum & viuo,
 valdè iniuriofus effem, fi nihil penfi
 haberem, illorum libertates fic prode-
 re, & ad iugum illud feruile iterum
 fubeundum cogere: quæ omnia à
 fuis ceruicibus penitùs iam pulfa &
 abiecta videram, priusquam ad eos
 accefferam. Postremò, coronam hanc
 meam, quam nunc & mihi, & maio-
 ribus meis, omni iugo folutam & libe-
 ram inueni, nouâ quadam ac turpi
 ferui-

seruitute impeditam relinquerem.

Hæc cùm ita sint, vehementer cupio & exopto: vt omnes boni ac fideles mei subditi, qui corruptis illis fucis decipiuntur; si motum aliquem internum, pulsūq; percipiant in intimis animi sui sensibus, ad veritatem tum indagandam, tum amplectendam, pias illas motiones, omnibus quibus poterunt honestis rationibus, & fouere, & augere velint: caueantque inprimis, ne sanctum illum spiritum, sic in illis mouentem & agitantem restinguant. Quòd si nullum talem adhuc sensum, in interioribus cordis sui partibus senserint: tunc istud eis consilium do, vt multum & studiosè legant, & cupidè seipsum aggregent, ad literatorum hominum congressus atque consilia: cæterisq; omnibus modis & rationibus contendant, quibus honestus iste illorum animi conatus adiuuetur. Quamdiu enim in religione, à nobis alieni sunt &

discordes, tam diu, aliter fieri non potest, quin sint tantummodò mei, ut ita dicam, semisubditi, à quibus quid aliud (quæso) expectem posse proficisci, quàm ea quæ manca sunt, & semiperfecta officia? Cùm certò sciam, optimas illorum partes, id est, eorum animas, à me semper alienatas fore.

Atque hîc oportunè quidem mihi datur occasio, ut vos, Dom. Episcopi, paucis alloquar. Nā ut tu Do. Dunelmensis Episcopo pereruditè hodiè in tuo sermone dixisti. Correctionem, si absit instructio, nihil aliud esse, quàm violentam tyrannidem: ita & tuum nunc officium est, & reliquorum etiam Ecclesiasticorum virorum partes sunt, & officia, ut tum sanctitate vitæ, bonisq; exemplis, tum puritate doctrinæ, quàm plurimos homines ad Deum lucremini: & cùm videatis Pontificios illos, tam sedulos esse & assiduos in suis muneribus perfungendis,

fungendis, vt nullis parcant vel labo-
 ribus, vel periculis, vt à vera Religio-
 ne, quoscunque poterunt, auertant:
 (tam diligēs nimirum Episcopus Di-
 abolus est,) idcirco par est, & rationi
 consentaneum, vt vos profectò in ve-
 stris itidem officiis obeundis, maio-
 rem curam & diligentiam adhibeatis.
 Quin regulam à *Paulo* vobis præscri-
 ptam sequimini: *Insta opportunè, im-*
portunè, argue, increpa, cohortare, sum-
ma cum clementia & doctrina. Et si
 quando antehac in hoc negotio fui-
 stis paulò negligentiores, nunc tan-
 dem excutite à vobis omnem segni-
 tiem, & nouâ quadam alacritate in
 hoc vestrum munus incumbite: e-
 ius rei successum, bonitati Dei relin-
 quentes: à quo cùm vocati fuerint, si-
 ue secundâ horâ, siue tertiâ, siue de-
 mum decimâ, siue ad extremum, ho-
 râ duodecimâ in vineam intrauerint:
 Credite mihi, quemadmodum ipsi
 Deo omnes erunt pariter accepti: eo-

dem certè modo (ita me Deus amet)
 illorum aduentus, mihi quoque hîc
 præpotentis Dei locum vicemque
 gerenti, erit gratissimus.

Venio nunc ad tertiam illam cau-
 sam, cur hoc potissimum tempore vo-
 luerim vos congregari. Nimirum, vt
 omnes illos modos & rationes exqui-
 ram, quibus meam in vos beneuolen-
 tiam, ac animi pietatem, possim pub-
 licè testatam relinquere. Et quan-
 quam benefacta mea illam habent na-
 turam, vt vel à me fieri, vel non fieri,
 meo pro arbitrio possint, spero tamen
 per gratiam Dei, benefaciendo me
 nunquam defatigatum iri. Atque hoc
 totum negotium in duabus rebus fi-
 tum est & collocatum: nempè in pro-
 curando, vt bonæ leges, statis quibus-
 dam temporibus, (quale hoc est istius
 Parlamenti peropportunum) condan-
 tur: & in prouidendo, vt fida illarum
 legum executio in perpetuum obser-
 uetur.

Quod

Quod verò ad plebiscita vestra & salutare sanctiones ferendas attinet: singularibus verbis hîc vobis sanctissimè spondeo, quod quicquid ex utilitate reipub. fuerit, & ad communem ciuium meorum societatem maximè conducibile, id ego priuatis meis commoditatibus, animique affectibus libentissimè semper anteponam. Sic enim animatus & sum, & semper eram, vt publicam ciuium salutem & utilitatem, priuatam meam tum utilitatem, tum incolumitatem, completi in se, ac continere existimarem. Atque hoc illud est, in quo maximum illud discrimen quod esse solet inter bonum Principem ac odiosum Tyrannum, potissimùm potest obseruari.

Sed hac in re, hoc tantum illud est, de quo velim vos præcipuè præmoneri: scilicet vt prouidè, cautèque circumcirca prospiciatis, ne nimia legum multitudine Respub. obruatur, idque

duas potissimùm ob causas. Primùm quòd in corruptissima Republica, plurimæ leges solent existere: at multò satiùs est, in Repub. prouidere, vt bonarum legum, licèt sint paucissimæ, fida habeatur executio, quàm vt ista legum (vt ita dicam) nimietate, hominum memoriæ tantoperè perturbentur. Deinde, in multis legibus excogitandis, (idque in vno Parlamento) nimium anxie & sollicitè vos ipsos defatigare, cùm neque satis otij sit, neque temporis, ad maturiùs de rebus singulis deliberandum: hoc nihil aliud est profectò, quàm miram quādam rerum confusionem temeritatis plenam introducere. Nam & verè, & rectè dixit Episcopus hodiè: In omni deliberatione, benè longum ad cogitandum spatium sumi oportere, ad exequendum verò, id quod maturè consultum est, maiorem celeritatem requiri. Cæterùm, quod attinet ad bonarum legum executionem, hac in re,

re, nunquam satis laudare possum
summam illam & admirandam Ma-
iorum nostrorum prouidentiam :
quorum prudentiâ effectum est, vt
in hoc regno tot Iudices, totque boni
viri in locis oportunis cum magistra-
tu collocarentur, ad prouidendum vt
bonæ leges inuiolabiliter seruarentur.

Quocirca, ad vos iam, qui sub me
Iudices estis & reuerendi legum in-
terpretes, qui que hîc mihi adestis tan-
quam oculi, auresque ad veritatem in-
dagandam, conuertenda est oratio
mea. Nihil autem ampliùs hîc vobis
possum dicere, quàm id quod olim
Iudicibus suis à bono illo *Iosaphato*
Iudæ Rege dictum erat. *Videte quid a-*
gatis: non enim hominibus, sed Iouæ iu-
dicabitis, qui vobis in re iudiciaria ad-
futurus est: quam ob rem facite, vt Io-
uam formidantes, cautè vos geratis.

Quemadmodum, autem vestræ
villicationis ratio à vobis mihi red-
denda est: sic & nos quoque eodem

modo oportet esse paratos , ad reddendam rationem, quàm integrè & inculpatè in officijs nostris perficiendis nos ipsos præstiterimus. Prætoriarum istarum sedes, non sunt loci in illum usum instituti, ut in eis, vestris studijs & priuatis animorum affectibus subseruiatis. Sed in illis subsellijs, abijciendi sunt omnes animi motus & affectus, & amor in amicum, & odium in inimicum deponendum est. Potentiorum omnis metus, & tenuiorum commiseratio reiicienda sunt. Oculi vobis sunt occludendi, ne dignitas ac differentia personarum à rectâ viâ vos auferat: amputandæ sunt item manus, ne muneribus coinquentur: & tam iustè temperatèq; in toto iudiciorum vestrorum cursu obambulandum est, ut Trutinarum more, neq; in dextram, neq; in sinistram præponderetis. Tres sunt præcipuæ virtutes quæ in vobis requiruntur: Scientia veri, Fortitudo animi, & integritas vitæ: ut & scienter perspi-

perspicere quod verum est, & audenter agere quod est iustum, & vtrumque possitis integerrimè perficere.

Quod ad me attinet, sanctissimè hic voueo, & coram Deo, ac in honorabili hoc vestro conspectu, solemnibus verbis promitto, me nullam vnquam oportunitatem omisurum, in qua aliquid possim prestare, quod ad meam curam ac diligentiam ostendendam in legibus plenè & perfectè exequendis vllò modo pertinere videatur. Et quemadmodum ego exopto, vt vos qui Iudices estis, velitis putare, omnem defatigationem vobis turpem videri, in tam præclaris istis vestris officijs perficiundis: sic, & ego etiam pro mea parte similiter spondeo, me nunquam defatigatum iri in vobis (vt meum postulat officium) examinandis, quàm laudabiliter & incorruptè, in vestris magistratibus obeundis, vos ipsos præstiteritis.

Habetis iam tres illas causas vobis

enumeratas : propter quas sollemnia
 istæ Comitia hoc tempore celebran-
 da curavi: quæ quidem omnes, ad v-
 num eundemque finem referuntur,
 nempe, vt gratam animi mei volun-
 tatem, tum verbis, tum factis, omni
 posteritati testatam relinquerem. In-
 terim tamen cùm omnia præstitero,
 quæ in hac mea oratione me vobis
 præstaturum recepi, agnosco me ser-
 uum fore inutilem. Inutilem autem
 cùm dico, velim existimetis, me ge-
 nuinum sensum illius verbi sequi, qui
 in Scripturis habetur : id est, Cùm
 omnia perfecerimus, quæ ad Deum
 rectè colendum pertinuerint, tamen
 in ea re, nos nostrum solummodò of-
 ficiū facimus: nec suprà quàm quod
 debemus facere, quicquam facimus.
 Eodem etiam modo, cùm & nos
 quoque omnia ea præstiterimus, quæ
 in nostra sita sunt potestate vt præste-
 mus, nihil aliud tamen profectò fa-
 cimus, quàm id quod à nobis fieri,
 nostræ

nostræ partes postulant, & officia : & si aliquid illorum vel omiserimus, vel in contrariam partem quicquam cōmiserimus, culpâ certè vacare non poterimus : ac illius facti ratio, nobis coram Deo reddenda erit. Neque enim denegandum est, quin hæc sit maxima & præcipua differentia inter iustum Regem legitimè regnantem, & nepharium Tyrannum violenter usurpantem.

Insolens nimirum ac ambitiosus Tyrannus idcirco sibi populum, regnumque dari autumat, ut ad inhonestas animi sui libidines ac voluptates explendas, eis abutatur. Contra verò, Rex verus & legitimus, idcirco se Regem esse constitutum, ac alijs hominibus præponi putat, ut publicam subditorum utilitatem, florentemque Reipub. statum conseruet : maximamque terrenæ foelicitatis suæ partem, in ciuium suorum florentissima fortuna ac prosperitate contineri

arbitratur. Si vos diuites estis & opulenti, ego certè nullo modo possum esse pauper: si vos fortunati & foelices, ego profectò nullius infoelicitatis possum esse particeps: & idcirco palam hîc vobis profiteor, nullam rem vnquam maiori mihi, vel curæ, vel voluptati fore, quàm vt vos florentes videam, & omni rerum copiâ affluent. Non equidem diffiteor, me seruum esse, est enim illud verissimum. Cùm autem vniuersam huius Regni multitudinem animo meo complector, & de illius membris partitim sic cogito, vt est in multas classes ordinésque discretè ac distinctè distributa: tunc certè negari non potest, quin omnium illorum hominum, ac subditorum meorum, qui in hoc regno mihi subseruiunt & mancipantur, Rex sim & Gubernator. Cæterùm, cùm totam hanc ciuium meorum multitudinem sic considero, vt est vnum quoddam corpus ex multis dissimilibus,

similibus, ac inter se discrepantibus
 membris conflatum & vnitum: tunc
 certè non est denegandum, quin, vt
 caput propter corpus, non autem cor-
 pus propter caput: sic etiam eodem
 modo, Rex propter multitudinem,
 non autem multitudo propter Re-
 gem, designetur & ordinetur. Quan-
 quam enim Rex & grex relata sunt,
 ac inter se mutuò respiciunt: Rex ta-
 men esse non poterit quisquam, si
 grex illi defuerit, cui præsit. Per multæ
 autem gentes sunt in rerum natura,
 quibus caput illud deest; quod eas
 moderetur & gubernet. Quocirca,
 minimè me pudet confiteri, nihil mi-
 hi videri magis honorificum, quàm,
 quòd summus sum ac præcipuus ser-
 uus totius Reipub. publicaniquæ ci-
 uium meorum foelicitatem, maxi-
 mam meam in hac vita foelicitatem,
 ac præcipuum mihi solatium ac orna-
 mentum fore, semper arbitrabor.

Sed quoniam non erat aut vnus a-

liquis, & item alter, aut certi aliquot
 particulares viri, qui egregiè præter
 cæteros de hoc meo aduentu lætaban-
 tur: sed vniuersa (vt dixi) multitudo,
 & totum augustissimi huius Regni
 corpus, communium consensu in-
 signem illam animorum suorum ala-
 critatem, solidumque ac internum
 gaudium declarabant, dum mihi de
 hoc meo nouo imperio, quod Deus
 mihi à multis iam temporibus desti-
 nauerat, gratulabantur: Idcirco, non
 vni alicui præ cæteris, aut pauculis
 nonnullis singularibus viris, præci-
 puè me deuinctum arbitror, propter
 istam in me tantam, & tam insignem
 animi vestri virtutem atque constan-
 tiam: sed vniuersæ potiùs Reip. cor-
 pori me per plurimum debere confi-
 tendum est. Nam vt in delictis, quod
 à multis peccatur, impunè peccatur:
 sic & in benefactis, cum aliquid ab v-
 niuersa multitudine, vno cum con-
 sensu, concorditer & alacriter fit: tunc
 par

par esse puto, vt non vni alicui, nec pauculis quibusdam speciatim, sed omnibus generatim, propter istud illorum in me benefactum gratiæ æqualiter referantur.

Cæterùm, quoniam non potui omnium hominum humoribus plenè satisfacere, qui vel honorem & dignitatem, vel commodum & mercedem à me expectabant: idcirco opus est, vt hoc in loco paucula quædam interponam, ad me ipsum hac in re aliquantulum excusandum. Tria sunt beneficiorum genera, quæ de me expectabantur: nam aut honoris & dignitatis incrementum: aut fauorem & gratiam, facilesque ad meam præsentiam accessus: aut priuatam vtilitatem, auctiorémque rei suæ familiaris prouentum, concupiuerunt. Si honorem in omnes æqualiter contulissem, tunc neminem profectò honoratum virum reddidissem: honor enim ibi esse non potest, vbi omnes æquantur,

aut vbi nullus est huiusmodi personarum gradus & differentia, vt alter alteri possit dignitate prælucere.

Si fores mei cubiculi omnibus ex æquo paterent, tum nemini omninò paterent: non est enim tam capax, vt omnes possint intromitti. Si in beneficijs collocādis, omnibus equabiliter benignè largitèrque facerem, fons benignitatis meæ breui exaresceret & exhauriretur, ita vt in nullos omninò possem liberalitatem exercere meam. Neque tamen hæc à me in illam partem dicuntur, quasi existimem in hisce omnibus tribus benignitatis generibus perparcè me quicquam aut illiberaliter fecisse. Imo confidenter affirmo, atque id etiam sine omni arrogantia, me omne genus munificentie, erga quàmplurimos, & largiùs & honorificentius cõpleuisse, quàm quisquam alius Regum Anglorum in tam breui temporis spatio vsquam ante hodiernum hunc diem comple-

uerat.

uerat. Et eam ob rem, veniam potiùs
 à vobis hac in re mihi petendam arbi-
 tror, propterea quòd paulò largior
 fortasse prolixiorq; fuerim in dando,
 quàm oportuit. Regio enim thesauro
 exhausto, 'quid aliud (quæso) rema-
 net, quàm vt ad vos confugiam, vo-
 bisque molestus sim & onerosus, vt
 de vestris facultatibus detraham, alijs
 quod largiri queam: id quod inuitis-
 simè profectò facerem. Quanquam
 enim verum est, id quod antea dixi,
 non vnum aliquem de plebe, aut de
 grege nōnullos quosdam promiscuè,
 sed totum huius regni corpus, & vni-
 uersam multitudinem, tam benè de
 nobis promeruisse: tamen erant certè
 nonnulli, qui vel propter officium
 suum quoungebantur: vel propter
 gratiam & auctoritatem apud popu-
 lum: vel propter aliam nescio quam
 huiusmodi occasionem, non solùm
 iam nunc in hoc meo aduentu, sed e-
 tiam priusquam in hoc regnum intra-

ueram, omnibus quibus potuerunt
 modis elaborabant, vt obseruantiam
 & beneuolentiam in me suam plus
 quàm ulli alij testificarentur. Neque
 tamen quicquam dubito, quin reli-
 qui etiam subditi mei, si vel in illorum
 locis fuissent, vel tam commodè illud
 perficere potuissent, parem in me ani-
 mi cultum & beneuolentiam osten-
 dissent: Tantus nimirum in me erat
 vester amor & pietas, & tam commu-
 nis omnium consensus & alacritas.
 Cæterum quoniam non multi qui-
 dem erant, sed certi aliquot nonnulli,
 qui in hoc officij genere præstando
 certatim quodam modo contende-
 bant, vt reliquis antecellerent: idcir-
 cò nullo modo committendum pu-
 tauì, vt istis illorum bene meritis, ni-
 hil reponerem: nisi haberi vellem
 omnium hominum ingratissimus.
 Quocirca, nequaquam mihi videba-
 tur à ratione alienum, vt aliquos ho-
 noris incremento ornarem, nonnul-

los prope me, fauore & gratiâ pollentes, collocarem: quosdam etiam qui de me optimè promeruerant, benignitate meâ opulentiores redderem: vt earatione instructiores essent & magis habiles ad suam in suis officiis dignitatem conseruandam: aliquos itidem nonnullos aliquantulum reficerem, quos cognoui homines fuisse fauore dignos, & satis etiam idoneos, qui ad meliora officia capescenda euherentur, sed propter tenuitatem suarum fortunarum, paulò infirmiores esse sentiebam ad tale onus subeundum, nisi meâ benignitate subleuantur. Quòd si paulò fortasse fui profusior in largiendo, quàm par erat: duæ certè res fuerunt, quæ me ad illud commouebant: quarum altera, honorifica meherculè fuit, & in primis laudanda: altera fortassis & minus habet in se laudis, & à meâ tota infirmitate pendet. Nam quod de benignitatis meæ fonte, quosdam quasi ri-

uulos in totum! huius Regni corpus largiùs effluere patiebar, vt hac bonitatis meæ affluentia, aliquot boni viri de vniuersa multitudine irrigarentur, qui tam insigniter de me promeruerant: istud profectò summæ mihi laudi fuisse, & honori arbitrabar. In altero verò benignitatis genere, si quid offendi, profectò id non tam meum vitium fuit, quàm illorum hominum culpa, qui beneficia à me tam obstinatè & importunè postulabant. Sed quoniam ratio & intelligentia quodam modo in nos infunditur, rerum autem experientia, non sine affiduo labore, tractuque temporis acquiritur: spero tempus id aliquando effecturum, vt & subditi mei posthac multò sint prudentiores, ac minùs mihi molesti in petendo: & ego itidem nonnihil tardior sim & cautior in concedendo, si id quod petierint, aut mihi, aut toti Reipub. incommodum fuerit, vt concedatur.

Nunc

Nunc verò, cum celeberrimi istius
 nobilissimique congressus causas
 omnes plurimis verbis vobis exposue-
 rim, hoc vnum solummodò restat, vos
 ut exorem, ne grauitèr molestèq; fe-
 ratis, si non tanto cum verborum ap-
 paratu & eloquentiâ mentem meam
 vobis aperuerim, quantam fortassis
 expectauistis. Totum enim hoc cri-
 men facillimè possem, si modò vel-
 lem, in grauiiores illas meas occupatio-
 nes, ac infinita penè negotia reijcere,
 quibus eram hoc tempore sic distri-
 ctus & occupatus, ut aut nullum, aut
 perexiguum sanè spatium habuerim,
 ad cogitandum. Præterea, si insuetus
 iste vester conspectus, ac tam honora-
 bilis cunctorum ordinum confessus,
 aliquid fortassis solemnitatis in se ha-
 bebat, quod præter morem non nihil
 me perturbauerit & impediuerit, non
 equidem mirandum est. Sed omissis
 his omnibus excusationibus, apertè
 profectò, ut meus mos est, vobis in-

dicabo, quidnam causæ sit, cur minus sollicitus fuerim, de verborum eloquentiâ. Meâ enim opinione nihil magis Regem decet, quàm ut tum perspicuè & apertè, tum sincerè & ex animo loquatur. Cùm apertè dico, hoc nimirum volo, ut tam dilucidè planèque loquatur, ut omnis absit in oratione ambiguitas: ne ut Ethnicorum olim oracula, sic nunc eius verba in contrarias possint discerpi, & distorqueri sentētias. Sincerū autē cùm dico, hoc certè illud est quod intelligo: nempe, optare me, ut tanta infit in Principis tum dictis tum factis honestas & integritas, quanta potest esse maxima. Rex enim, quantò maior est, & cæteris hominibus conspectior, tantò profectò se gerat oportet rectiùs & honestiùs in vita: & sic semper loquendum, ut illius oratio possit esse fidelissimus animi sui nuntius & interpretres.

Atqui istud genus eloquentiæ,
velim

velim semper vt à me expectetis : quia
in re, si sic de me existimabi-
tis, nunquam profectò
fallam opinionem
vestram.

F I N I S.



Ad florentissimos Aca- demicos Oxonienses.

A Mici veteres candidissimi mei,
Quibus & atas, & ingenij summus vigor
Et otium, & quod rerum primū est omnium,
Insignis, atq; excellens est Scientia:
Vos (inquam) populares, opem ferte obsecro
Homini bene cupienti, & languenti Seni.
Quod vos hodie nunc estis, id ego olim fui:
Musarum amans, atate florens, otio
Fruens, doctrina qualiscunque particeps.
Videtis quid queant tempora, cuncta auolant:
Nil iam remanet prater voluntatem bonam.
Hic quicquid est mali, facite melius precor.
At si boni quid est, impense gaudeo.
Valete quā diu valere vos velim:
Vivite quā longo ipsi cupiatis tempore.
Et sic opinor vivetis satis diu:
Valebitis autem semper, ut me amet Deus.



